

Theses  
et Quaestiones Medicae,  
in Scholis Parisiensibus  
discussae et agitatae,  
M.<sup>o</sup> Hyacintho Theodoro  
Baron Decano:


à Die Sabbati 4.<sup>o</sup> 9.<sup>bris</sup> 1730,

ad Diem Sabbati 6.<sup>um</sup> 9.<sup>bris</sup> 1734.

---

Prior Decanatus.

Collegit, Ordinavit et in Facultatis Bibliotheca reposit  
Hyacinth. Theod. Baron fil. Decanus, anno 1751.



1  
DEO OPTIMO MAX.

UNI ET TRINO,

VIRGINI DEIPARÆ, ET S. LUCÆ  
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS  
manè discutienda, in Scholis Medicorum, die Jovis  
vigesimâ-tertiâ Novembris M. DCC. XXX.

M. HYACINTHO-THEODORO BARON,  
Doctore Medico, Facultatis Decano, Præside.

*An Duodenum Venter alter?*

I.



B oris fundo ad podicem, excurrit canalis totum corpus sextiès longitudine superans. Longissimus ille ductus, excipit cibos, ingesta concoquit, sanguini suppeditat chylum, fœces protudit. Hic amplior, illic angustior, varias eundo recipit figuras, variaque nomina. Primum ori naribusque inhians Pharynx est; mox strictior, Oesophagus, qui juxta colli & thoracis vertebra paululum divergens à sinistris protenditur deorsum. Tunc inferiorem Diaphragmatis musculorum interstitium dum subit, in Abdominis cavitate propagatur. Ibi in amplissimam exspatiatus capacitatem, Venter audit. Rursus contractior, plurimisque intortus gyris, seriem constituit intestinorum. Horum species duæ; tenuia; Duodenum, Jejunum, Ileum: crassa, Cœcum, Colum, Rectum. Membranaceus canalis ille pluribus substantiâ dissimili componitur lamellis. Interior, villosa, dulcem stillat lympham; altera nervea est, innumeris conspersa glandulis. Hanc, ad mollem expressionem glandularum, succorumque commixtionem excipiunt varii fibrarum carnearum ordines. His omnibus commune præbet involucrem, membrana, in Pectore à Plevrà, in Abdomine à Peritoneo derivata. Diversarum alimentarii hujus tubi partium licet æqualis ad Chylifera necessitas; Venter tamen præcipua illius habetur officina: reliquis partibus, pro vario situ & fabricâ, varia conceduntur munera: sic Oesophagus alimenta deducit in Ventriculum, Intestina crassiora alimentorum excrementa amandant foras; tenuiora, Chylum lacteis committunt. Ne tamen credas, Duodenum ad id solum officii fuisse à naturâ datum: illud æquiori jure Ventriculo comparaveris, cui & fabricâ & functionibus simillimum est.



**V**ENTRICULUS in Epigastrio situs, versùs Hypochondrium sinistram gibbosâ & crassiori suâ parte extenditur. Duo, quibus patet orificia, solâ Vertebrarum latitudine ab invicem dissita, superius aliquantulumque posteriùs spectant. Horum alterum, quod à sinistris, elatius est & Diaphragmati proximum; alterum, quod à dextris, Pylorus, magis deprimitur, totâque Hepatis, cui subjacet, crassitie, distat à Diaphragmate. Fundus orificiis adversus, seriante Ventriculo deorsùm est, ingestis alimentis paululùm expanso, paululùm ad anteriora vergit. Exterior Ventriculi membrana, à Peritoneo, ex inferiori Diaphragmatis superficie in illum reflexo, ducit originem. Musculosam constituunt tunicam tenuissimam fibrarum carnearum stamina, creberrimis tendineis filamentis interfecta. Horum fasciculus ab orificio superiori ad Pylorum extenditur, eumque complectendo continuatur in Duodenum. Orificium ventriculi superius amplectuntur duo alii, unus hinc & indè, fibrarum carnearum fasciculi, qui mox sese decussando, suprà anteriorem posterioremque Ventriculi faciem, in plura filamenta divisi latè exporriguntur. His exterioribus aliæ subsunt interiores fibræ, quæ circuitu factò Ventriculum ambiunt & in crassiori sive sinistro Ventriculi extremo, circulorum concentricorum ad instar conspicuæ sunt. Nervea membrana, quæ intùs villis obducitur, quò plures hujusmodi succi gastrici scaturigines sustineat, pluribus plicatur rugis in Ventriculi cavo fluctuantibus. Sanguinem vehunt hinc & indè Arteriæ, ab ipso Celiacæ trunco ejus que Hepatico & splenico furculis oriundæ; advectum revehunt Venæ, dextrorsùm ab ipso Venæ Portarum trunco, sinistrorsùm à splenico ejusdem Venæ ramo propagatæ. Nervos uberrimè suppeditat octavum par; hujus duo Rami juxtà Oesophagi latera descendentes, circà orificium superius in plurimos ramulos divisi, miris impliciti modis, per omnem Ventriculi superficiem disperguntur. Tali constructus artificio Ventriculus, sinu suo alimenta excipit & retinet in Chylum convertenda. Sed ibi nondùm omninò subacta, per Pylori agustias, declivi Ventriculi situ, fluunt in Duodenum, ulteriùs elaboranda.

## III.

**P**YLORO continuatur Duodenum, è tenuioribus intestinis amplissimum. Hoc, vicinis partibus firmiter alligatum, serpentino progreditur ductu & triplicè curvaturâ gaudet. Duos tresve digitos suprà Pylorum ascendens à posteriori, deorsùm, flectitur anteriùs & inter Cyllidem scelleam atque Pancreas sensim demittitur. Tum suprà Cavam & Portarum Venam serè transversim procedens, iterato flexu ascendit versùs Ventriculum; ibi tandem in angulum acutum conformatur & tertio flexu deorsùm tendit, incipitque Jejunum. Duodeni cavitatem alluunt præstantissimi liquores duo, Bilis, succus Pancreaticus. Pancreatis succus, tenuis, dulcis, lymphaticus humor est. Ex majori glandulâ, juxtà primam Lumborum vertebra ex Hepate versùs Lienem transversim excurrente & intrâ Mesocoli duplicaturam delitescente, ex Arterioso sanguine separatur. Bilis, resinofus, flavus, amarus liquor est. A sanguine Venoso in omnibus serè Abdominis visceribus

3

lymphâ suâ artificiosè exuto & Venâ Portarum in Hepar delato, secer-  
nitur. Sulphurci hujus liquoris pars altera, continuo fluxu derivatur  
in Duodenum, dùm altera in Cystidem felleam amandatur: ibi providè  
colligitur in Duodenum pariter effluxura, ubi primùm alimentis in  
chylum mutantis turgens Ventriculus Vesiculam opportunè comprimer.  
Utramque Bilem deferunt in Duodenum ex Hepate, Canalis Hepaticus; ex  
Cystide, Cysticus. Ambo mox invicem coeunt ductum efficiunt com-  
munem, Choledochum. Suus est & Pancreati ductus excretorius, qui Cho-  
leodocho Duodenum subeunti jungitur. Uterque, ut liquorum præcaveatur  
refluxus, intrâ illius membranas obliquè procedit & fluctuante oblongoque  
aperitur osculo. Insuper irrorat adhuc Duodeni cavum lymphatici humo-  
ris alia scaturigo, Brunneri glandulæ. Exiguarum glandularum congeries  
est, quæ suprâ nerveam Duodeni tunicam magnâ copiâ dispositæ, singulæ  
proprio Canali excretorio intrâ illius cavitatem hiant, uberissimamque pro-  
fundunt lymphæ copiam. Itâ igitur, ut Ventriculo, sic Duodeno sua est,  
& retinendis & coquendis alimentis aptissima fabrica, sui sunt liquores effi-  
cacissimi.

#### I V.

**V**ENTRICULO succenturiari Duodenum, alteramque esse digestio-  
nis Alimentorum officinam dubitas? Expositam utriusque recorderis  
fabricam, utriusque officia scruteris. Ampla Ventriculi cavitas ingestos re-  
tinet cibos. Hos inibi commorantes, succus Gastricus, liquorque è dissito  
Parotidum, Maxillarium, Sublingualium, aliarumque glandularum fonte  
promanans, humectat, diluit. Idem peristaltico fibrarum Ventriculi pla-  
cido agitantur motu: Diaphragmatis & musculorum Abdominis sese mutuò  
librantium alternis oscillationibus huc & illuc versantur. Viscerum adja-  
centium calore, rarefactis, quibus imbuuntur æris partibus, attenuantur exa-  
ctiùs. Hæc omnia in Duodeno concurrunt. Illius amplior tenuibus aliis  
intestinis denegata capacitas, inchoatæ Digestionis operi perficiendo ap-  
tissimum suppeditat spatium; at Ventriculo strictior & in longum producta  
Duodeni cavitas, intimiùs complectitur Alimenta, eorumque exactiori mix-  
turæ favet. Tortuosâ illius dispositione, lentiorque in superandis angulis  
morâ, contenta retinentur diutiùs. Itâ per flexuum angustias non elabuntur,  
quin diversi generis liquoribus de novo appellentibus, perfunduntur inti-  
miùs. Stricta cum vicinis partibus alligatio Duodeni flexuras continet, mo-  
tumque peristalticum citatiorem retardat & moderatur. Id omne sic provi-  
sum est, ne humoribus diversis jugiter vellicantibus citiùs effluant, quæ  
ulteriorem exigunt digestionem. Addam quod res est. Intuearis uberrimos  
varii generis latices. Hic Bilis, illic succus à Pancreate, tandem à Brun-  
neri glandulis nova liquoris copia. Plus Duodeno quàm ipsi Ventriculo ad  
Chylosum perficiendam fortè tribues. Crassus, cineritiisque è Ventriculo  
Chymus, in Duodeno liquorum opportunâ commixtione, novam induit for-  
mam. Uberrimâ & subtili lymphâ à Pancreate & Brunneri glandulis am-  
plius diluitur. Potentiori tandem menstruo, Bile scilicet, exactiùs pene-  
tratur adhuc. Hæc, resinosa, sulphurea, saponacea oleosas & gelatinosas  
Alimentorum particulas, salivæ, assinisque liquoribus impervias, subit,  
abripit, ab inutilibus utiles; ab excrementitiis nutritias segregat. Alkalino

4

quo gaudet principio, sulphurea aqueis commiscet, & albescit liquor. Jam Chylus est, in subsequen-  
tium intestinum serie à lacteorum osculis facile  
excipiendus.

V.

**Q**UID plura? Perspectâ Duodeni cum Ventriculo convenientiâ, quan-  
tùm à tenuibus aliis intestinis differat, perquiras sedulus. Hæc, Lique-  
ribus transitum, non hospitium præbere destinata, angustioris alvei repe-  
ries; plurimis, sed variabilibus flexuris donata deprehendes. Non stricto, sed  
laxiori mesenterii vinculo devincta & liberiùs fluctuantia observabis. Insu-  
per animalis recens à pastu mastati exta spirantia consule. Jejuni & Ilei  
superficiem curiosius inspicere; eam perreptant capillares mille rivuli lactem  
vehentes liquorem. Hi quaquaversum in intestinis hiantes præterlabentem  
hauriunt Chylum. Mox plures simul coeuntes, variisque intricati modis,  
maiores sensim efficiunt ramulos, qui in Glandulis Mesaraicis concu-  
rentes, mox que ex iis emergentes, diversa constituunt Venarum lac-  
tearum genera. Illæ mesenterio suffultæ, intrâ illius lamellas ad com-  
mune chyli receptaculum progrediuntur, terminanturque. Vasa hæc lactea  
plura in Ileo, in Jejunio plurima, in Duodeno & Ventriculo paucissima,  
rectius nulla, reperire datum est. Hinc abundè patet Duodenum, non esse  
ut intestina tenuia, Chyli secretionis instrumentum; sed, ut Ventriculus, ali-  
mentorum digestionis organum.

*Ergò Duodenum Ventriculus alter.*

DOMINI DOCTORES DISPUTATURI.

*M. Joachimus Costar.*

*M. Joan. Baptista Dubois,  
Serenissima Principissa Do-  
ctaria de Conty Medicus.*

*M. Claudius Ducers.*

*M. Bernardus de Jussieu,  
Regia Scientiarum Aca-  
demia, Regique Socie-  
tatis Londinensis Socius,  
& in horto Regio Bota-  
nicæ Prodemonstrator.*

*M. Guillelmus - Josephus  
de Lépine.*

*M. Claudius Vergne.*

*M. Franciscus Mery, Rei  
Herbaria Professor.*

*M. Ludovicus - Hieronimus  
Cofnier.*

*M. Jacobus - Benignus  
Winslow, Regia Scien-  
tiarum Academia Socius.*

Proponerebat Parisiis, **HYACINTHUS - THEODORUS**  
*Autor.* **BARON**, Parisinus, Baccalaureus Medicus, A. R. S. H.  
1730. à sextâ ad meridiem.